

De nova *Purpuriceni* specie e Persia austro-orientali
(Coleoptera, Cerambycidae).

Scripsit

Andreas Semenov, petropolitanus.

Purpuricenus zarudnianus, sp. n.

Purpuricenus (s. str.); gracilis, elongatus, dilute cinnabarinus, capite toto vel solum gulâ exceptâ, antennis, pedibus, meso- et metasterno, scutello, elytrorum maculis transversis basalibus fasciam communem plus minusve angustam (ad summum $\frac{1}{5}$ elytrorum occupantem), ad suturam plus minusve interruptam, epipleuras haud attingentem formantibus maculisque ovalibus apice, plerumque autem $\frac{2}{5}$ elytrorum apicalibus nigris; abdomine testaceo; prosterni parte posticâ rarissime nigrâ, pronoto semper, ut videtur, toto cinnabarino. Capite genis longis, transverso oculorum diametro parum brevioribus, fronte brevissime fusco-pubescente, ejus margine laterali superne ad basin antennarum valde dentiformiter s. fere corniformiter eminente (imprimis in ♂). Prothorace angusto, longitudine suâ vix nisi latiore, lateribus fere non rotundato, simpliciter ad medium dilatato ibique tuber conicum semper evolutum, etsi apice nonnunquam obtusatum, efficiente, ante basin constricto, angulis posticis extrorsum plus minusve subporrectis; disco valde convexo confertissime regulariterque minus crasse punctato, fere nudo; antice brevissime parceque, vix conspicue pubescente, post medium aliquot pilis erectis sparsim instructo, longe ante basin, plerumque prope medium callulo s. plicâ laevigatâ nitidâ notato. Scutello angusto et elongato. Coleopteris summâ latitudine plus duplo (2,15—2,25) longioribus, humeris sat obtusis, lateribus omnino fere parallelis, apice singulatim rotundatis, angulo suturali prorsus oblitterato nequaquam dentato, confertim haud crasse, ad apicem sensim tenuius punctatis, opacis, nudis, solum parte nigrâ apicali pube obscurâ brevissimâ accumbente haud dense obsitâ. Alis inferioribus valde infumatis. Metasterno crebre punctato pube fulvescenti-subgriseâ accumbente sat longâ, abdomine nitido subtilissime crebreque punctulato pube griseo-fulvâ tenuissimâ brevique, om-

nino accumbente abunde indutis. Pedibus tenuibus sed modice elongatis, tibiis omnibus rectis; tarsis angustioribus, penultimo articulo, praesertim posticorum, anguste lobato.

♂. Antennis corpore toto plus quam sesqui (circiter 1,5) longioribus, tenuibus, articulo 3^o valde elongato, duobus antecedentibus unitis multo longiore, articulo ultimo (11^o) longissimo, longitudinem praecedentis circ. sesqui superante, manifeste e duobus articulis non omnino connatis composito, quorum terminali brevior apiceque incurvo.

♀. Antennis elytrorum apicem haud attingentibus, etsi dimidium partis nigrae apicalis tangentibus, normalibus.

Variat: *a*: abdomine nigro (aberr. **nigriventris** n.); *b*: capite maximâ ex parte (vertice, partim fronte, temporibus, gulâ) erythrino (aberr. **bicoloriceps** n.).

Long. ♂♀ 9,5—17,5, lat. 2,8—5,1 mm.

Hab. in palmetis *Persiae austro-orientalis*: terra *Geh*: alveus Rong (28—30. III); terra *Kaserkend*: vic. Mataseng (31. III), inter vic. Tshamp et Surmitsh (6. IV); terra *Bampur*: vic. Surmitsh (9. IV); terra *Sarhad*: Sadk (30. IV), Zar (7—8. V), vic. Tamin (11—12. V), curs. super. fl. Rud-i-ljaadis (14—15. V) [exped. N. Zarudnyj! 1091]. — 21 specimina (10 ♂, 11 ♀) (coll. P. Semenov).

Species distinctissima, ab omnibus congeneribus palaearticis habitu graciliore pronotoque elongato erythrino discrepans; quoad dispositionem colorum etc. accedit praesertim *Purpuriceno desfontainei* Fabr., a quo tamen valde discrepat formâ corporis graciliore, pronoto angustiore, toto unicolore, ad latera, sicut in disco, non piloso, tuberibus lateralibus minus evolutis; fronte multo brevius pubescente; prosterno vix pubescente, metasterno pube omnino accumbente induto; abdomine nitidior plerumque testaceo; antennarum ♂ ultimo articulo manifeste e duobus articulis connatis composito; scutello paulo brevior etc. — Dedicata illustri exploratori regionum turanicarum et iranicarum.